

續金華叢書





義我  
物記

表勵準



甲春康宗校  
子永胡楸鋟



義烏人物記引

記者何紀實也紀實者何昭世則也世則昭而記義盡矣洪與劉嘗志毘縣以及人物矣曷爲著之病二子也二子不其紀實乎曷爲病之顧其晦弗彰淆弗別善弗旌是以病之然而名爵史編固嘗顯矣奚俟於著特沈微者爲泯泯焉爾是故刪其所不必錄者參吾之所必錄者矣考索而著定著定而記成記成而實紀於是晦焉用彰淆焉用別善焉用旌故曰世則昭而記義盡矣嘉靖十四年仲冬旣望

綢東金江書

東金王書

昔者聖人出而治世，必先定其民之志。故曰：『民之難治，以其多欲。』今夫天下之人，皆欲富貴，而不知富貴之由。故曰：『富貴不能淫，貧賤不能移，威武不能屈，此謂之大丈夫。』

凡例

一楊琬傳取後漢書駱統傳取三國志駱賓王傳取唐史宗澤徐  
僑傳取宋史黃潛傳取元史其餘諸傳或采洪遵郡志或考劉  
同縣志或按朱子宋名臣言行錄呂祖謙十七史吳師道敬鄉  
錄鄭柏金華賢達傳更參之行狀碑銘譜圖記序諸先正文集  
以取其大槩而節爲小傳不敢妄改其舊傳或有詳略不同則  
取其長而姑置其短以備綜覈焉

一忠義孝友人之大節故以爲先而政事次之文學又次之

一郡縣有志卽古列國史也皆所以紀事行遠例當稱名今依史  
氏之例皆以名書唯子孫之於祖考以字書之

一楊琬已入宋濂浦陽人物記蓋浦陽未置縣時地隸烏傷琬自  
高祖茂始遷攷其所居處實浦陽地按洪遵以扶隸浦陽以扶  
之子喬琬隸烏傷何耶然必有所據焉爾觀其封烏傷新陽鄉  
侯及攷大明一統志亦書義烏人故載於此不以浦陽人物記

而遂遺也

一郡縣志缺畧者如葉由庚喻侃樓大年朱環金涓見宋潛溪文集及賢達傳明白可據今皆增入

一傳中知所從來者則書曰自某郡來遷於義烏不知者但書曰縣人至於居在何鄉年壽多少傳世遠近可考者亦書

一舊有名而無字者因之不知其事之詳而姓名不可闕者附諸傳中

一贊文之作則於傳中所未備者藉是以發之豈敢以管見效史氏作品評耶

一本傳所載與墓銘行狀不同歷官次第行事後先多紊亂難攷今擇其理優者載之

一責人欲恕論人欲盡故是書去取不得不嚴今據諸史傳志行實昭著書傳可攷者旣以類輯之矣又或畧示微意於贊中其有載於他志而不入甚至無足稱者欲並不書恐貽後人脫畧

之疑故自爲論之以俟博聞高見者定焉  
一八記者皆先賢達蓋棺論定故也



一、出書者其資藝益於世也

之類為曰自補之以其利則高其言也

義烏人物記標目

上卷

忠義

宗澤

王禕

孝友

顏烏

樓蘊

周祖仁

朱環

政事

楊埏

駱俊

駱統

朱幼

葉綦

朱質

黃夢炎

康植

朱元龍

喻侃

虞復

樓大年

朱文

龔永吉

下卷

文學

龔幼瑜

駱賓王

楊忱中

喻良能

喻良弼

何恪

陳炳

徐僑

傅芷

王邁

傅寅

施郁

葉由庚

陳鼎

劉應龜

傅野

陳堯道

王炎澤

石一鰲

黃潛

朱震亨

金涓

朱廉

樓璉

王紳

王稔

王汶



義烏人物記卷之上

續金華叢書

後學金江著

後學金沙校

忠義篇

天下有大閑互萬世而不踰者忠義是也並輝二耀競美兩間  
夫誰爲之蓋萃天地勁正之氣發爲磊落瑰偉之行蹈白刃赴  
水火歷萬死而不改其操故龍逢於夏比干於商申蒯於齊弘  
演於衛紀信樂布於漢向雒嵇紹於晉顏真卿張巡許遠於唐  
誠烈士哉宋當靖康建炎之間虜人長驅而南也宗澤知磁州  
獨憑城死守爲天下倡及留守京師以忠義鼓羣盜嬰方銳無  
前之鋒時河北已沒郡縣奉爲國有江南卒賴以立國力請回  
鑾以圖恢復中原爲邪計阻之積憤而卒我國朝初雲南未奉  
正朔王禕奉詔往諭遂不屈死蓋禕之功業於澤雖少見然皆  
知事君之大義守身之大節不以成敗利鈍而少變其扶天常

其植人紀其褫亂臣賊子之氣裨補世教甚有力焉江生也晚  
間聞諸鄉薦紳先生及攷傳誌備知二公履歷而景慕其氣節  
未嘗不爲之浩嘆作忠義篇以爲後世人臣之勸

### 宋宗澤傳

宗澤字汝霖縣人母夢雷電紅光下燭牀而生澤自幼有大志登元  
祐六年進士第調館陶尉歷龍游膠水趙城令改知掖縣差通判登  
州忤道士得倖用事者褫職羈置鎮江尋監鎮江酒稅靖康元年用  
薦者假宗正少卿充和議使澤奏名不正改計議使衆謂澤方剛難  
合而止除直秘閣知磁州從羸卒十餘人單騎之官至則治城池修  
器械廣儲蓄募敢勇爲必守計且條畫邊防及勤王策進秘閣修撰  
河北義兵都總管康王再使金過磁澤力止之王遂回相州有詔以  
澤爲副元帥加集英殿修撰從王起兵入援澤自將兵與金人數十  
戰皆有功王承制除徽猷閣待制方進兵臨濮而京城不守矣金人  
逼二帝北行澤卽引兵趨滑抵大名將徑渡河據其歸路邀還之而

勤王之兵無一至者又聞張邦昌僭位卽欲先行誅討乃還軍衛南  
且上書高宗勸進建炎元年五月高宗卽位南京趨詣行在所入對  
涕淚沾臆陳興復大計踰千言且曰願陛下一怒以安天下之民臣  
雖鴛怯當冒矢石爲諸將先得捐軀報國家志願足矣高宗壯其言  
擢龍圖閣學士知襄陽府時方議割河東北蒲解地上疏諫止改知  
青州尋知開封府宣布恩威豪強斂縮盜賊屏竄河東王善最爲巨  
寇澤單騎說降之王再興李貴楊進王大郎等皆相繼降卽上疏乞  
車駕回京時欲幸維揚金陵澤復以疏諫不聽遷延康殿學士京城  
留守兼開封尹金人自鄭州抵白沙距京纔數十里將部伍乘城澤  
命解甲歸休毋事張皇時已遣將劉衍率兵在外大敗虜衆又遣王  
宣敗虜滑州進資政殿學士旣至修宮禁治城壁增武備結連諸路  
義兵燕趙豪傑京城內外所屯兵實百八十萬方尅日大舉渡河前  
後二十餘疏力請上還爲黃潛善王伯彥等所沮憂憤疽發於背諸  
將入問疾矍然起曰吾以二帝蒙塵至此汝等能殲滅醜虜吾死何

恨眾皆流涕曰敢不盡力諸將出澤歎曰出師未捷身先死長使英雄淚滿襟遂薨是日風雨晝晦臨終無一語及家事但連呼渡河者三時年七十贈觀文殿學士通議大夫諡忠簡澤薨數日間將士散去者十五六都人憂之相與請于朝言澤子穎嘗居戎幕得將士心宜用以卒父功會杜充已除留守乃以穎爲秘閣留守判官充反澤所爲穎屢爭之不從尋請持服歸自是豪傑義士悉皆散去而中原不守矣穎後爲兵部郎中諸孫皆用廕補官惟從孫武繼登進士第贊曰高祖南渡澤留守東京招徠羣盜數百萬使一舉而取河北數郡當是時也施爲整頓幾復中原而高宗已無北還意澤於是勸回汴京前後凡二十四上疏每爲汪黃所沮積憤而死可悲也夫嗚呼儻假之以年則神州之壁可完二帝北巡未必無還期惜澤死而志竟莫伸天平

皇明王禕傳

王禕字子充其先太原之祁人五代時節度使彥超自會稽遷義烏



之鳳林又自鳳林遷青巖禕幼秀敏酷嗜古學從黃潛學潛以斯文之繼任之早游燕京諸儒判薦其文行於朝不報遂南歸會太祖皇帝取婺辟爲掾授江南儒學提舉司校理再轉起居注尋陞同知南康府事召還議卽位禮復出爲漳州通判又召修元史同爲總裁官書成拜翰林待制承直郎同知制誥兼修國史院編修官預教大本堂出使吐蕃未達境召還洪武五年正月奉詔往諭雲南六月抵其境見梁王把都而諭之時梁王已有降意會元之遺孽自立於朔漠者遺臣脫脫徵糧餉於梁王覘知其與中國通迫其殺禕以自明梁王不得已出禕見之脫脫欲以威屈禕慷慨罵曰天訖汝元命我朝實代之汝如燭火餘燼尙欲與日月爭光耶吾將命遠來豈爲汝屈惟有死而已寧以迫逼爲懼耶脫脫怒其言禕遂被害時年五十有二正統間贈翰林院學士諡忠文所著有華川前後集二十五卷玉堂雜著五卷詩五卷續大事記七十九卷弟補字子勉以明經薦厯任登州招遠縣主簿從弟初字子升薦授萬泉縣主簿所著有時習

齊藁長子綬字孟縕工五言詩有愚軒集仲子紳孫稔曾孫汝別有傳

贊曰禕以雄才受知太祖故於出使雲南不屈而死可謂烈丈夫者矣其忠義之心雖本乎天性夫亦由學而成歟其後以文學鳴是知忠於國者必昌厥後云

孝友篇

父子之親天性也自世教漓人始以孝弟爲難能而旌別之至習俗之偷鮮有能覺者嬴政以子廢母胡亥以弟弑兄劉季分羹呂后不哀其子綱常倫理果安在哉噫上有所好下必甚焉德色借鋤諄語取箒賈誼之言信矣夫若顏烏者習俗不移天性獨至親歿之時躬負土石感烏嘸泥來助吻爲之傷貞孝上通神明可感異類是非難哉江聞議者以顯庸君子流芳無窮忘世處士泯滅無聞每竊笑之是焉足以議論人物耶彼懸銀黃拖朱紫志遂當時身死未幾不能道其名若字者往往有之

至若閭巷之家布衣之士修孝弟之道隆愛敬之誠傳志必謹以詔後世然則顯晦固不足較也有志之士寧不於是重有感哉江不敏間聞鄉先正及舊誌若烏者未嘗不爲之欣慕故謹錄之繼烏者宋之樓蘊周祖仁元之朱環亦庶幾焉爾自秦迄今一千七百餘年以孝友著者止三人焉亦艱矣附之以勵鄉人

### 秦顏烏傳

顏烏縣人事親孝父亡負土成塚羣烏銜土助之烏吻皆傷因以名縣

贊曰烏當嬴秦人倫廢壞之時孝行足以感異類彼所謂豪傑之士雖無文王猶興非歟

### 宋樓蘊傳

樓蘊字季發縣之在城人母喪廢櫛沐鹽酪不入口結廬墓左繞塚哀號塚下耕者爲之墜淚負土築塚日自課三十肩塚高數仞鄉人

合辭請於郡邑刺史遣從事勞之且問狀固謝曰此人子之常不願賞鄰里強之不可歲時祭享不用釋老楮幣終其世巫祝不至門人稱曰孝子呂祖謙銘其墓龔應之請於朝從祀顏氏廟

### 宋周祖仁傳

周祖仁縣人親喪廬墓朝夕號慟甘露降於墓柏人稱曰周孝子

贊曰烏之貞孝無足議矣蘊與祖仁結廬墓左朝夕號慟愛日之誠未知何似泣血之哀有足稱焉故錄其行而著其名所以勵風化而敦彝倫焉爾

### 元朱環傳

朱環字君玉縣之赤岸人襁褓時無兒啼聲仲父桂奇之養爲子桂後生璧父定周因外環環益孝謹凡勞事皆服行不知有寒暑時境內多盜白晝出道上劫人財桂有金數百兩與璧謀匿窖中璧夜發去反誣環所爲桂怒褫環襦袴立之大雪中一日夜不使去環恂恂謝過無一言辨其冤桂猶日虐環五六年間頗死者數四恆順受之



不怒桂死遇璧益厚璧子慶多暴或嫁以殺人罪環憂不能食竭私財救之慶獲免環善讀書寶祐間嘗舉進士年八十六終於家子元字子初至元末有盜數千起縉雲過永康置砦峽源山山抵元家甚邇盜將劫元父環及環兄遇魁爲謀帥元聞遽告二翁速避寇不聽復涕泣諫翁罵曰豎子不解事江南內附久誰敢叛耶設有寇不過鼠竊狗偷何足病元自度賊若縛翁去則是翁從賊反官坐以法雖有百喙莫能白爲今之計者孰若殺賊自明乃與役夫傅參謀執刃伏垣或止之曰賊勢張甚汝不畏作殪醢耶元曰吾知有親爾若得白親以無罪雖萬死不恨會賊偵騎至竟斫殺一人梟首市中以血手入示翁負之北逃賊平翁竟無罪

贊曰宋濂云昔尹吉甫子伯奇無罪爲後母譖而見逐履霜中野作履霜操其辭多怨傷夫伯奇不必爾也父母惡之勞而不怨何假於辭哉今環之無罪與伯奇同環羸身立大雪中則又非若履霜比也乃能順受之而無怨元爲親故拔劍斫賊而不知有身蓋

有得於家教然也郡縣志乃失載焉用爲表之

政事篇

孔門設教有政事之科若由求之徒皆能施於有國以著成驗者也是故有天下之才有一郡一邑之才大小雖有不同其以福天下均也吾邑之士有忠信廉勇禮樂文章其憂公忘私贍國充民足以澤潤天下生留餘惠沒留餘法者載在政事其無從考質而所可見者不過叙其科第品秩之盛而已吾邑第進士自王固始固字天貺卒官恩陽令從孫永年繼登進士知福州贈正議大夫永年之子鑄通判嘉興贈金紫光祿大夫永年之孫寧提舉廣東常平寅厯知宜連藤柳峽饒江七州永年之曾孫謙知隆州自南渡後第進士以樓圖南爲首知吉州贈中奉大夫從孫晏子固俱世科若龔應之官右史許復道子堪並登文武兩科宣教郎陳昭郡丞黃耕秘書丞王世傑醴陵簿周大亨台州司理樓斗南侯官簿傅光龍知縣何傳長沙同知朱

肇他如朱叔騏與諸兄夢魁復淳文魁夢周宗周炎皆登第於  
宋季入仕於元歷官郡邑王龍澤登宋進士第一拜簽書昭慶  
軍節度判官宋亡仕元爲監察御史故自楊琬至龔永吉凡十  
有四人敢錄之以爲將來者勸其餘位望雖隆政蹟無聞出處  
去就終未光明者不敢妄爲紀載以俟博聞高見者

漢楊琬傳

楊琬字機平高祖父茂本河東人從光武征伐爲威寇將軍封烏傷  
新陽鄉侯建武中就國傳封三世有罪國除因而家焉父扶字聖儀  
爲武源令遷交趾刺史有理能名兄喬爲尚書容儀偉麗數上言政  
事桓帝愛其才貌詔妻以公主喬固辭不聽遂閉口不食七日而死  
琬初舉孝廉靈帝時爲零陵太守是時蒼梧桂陽猾賊相聚攻郡縣  
賊衆而琬力弱吏人憂恐琬乃特制馬車數十乘以排囊盛石灰於  
車上繫布索於馬尾又爲兵車專轂弓弩尅期會戰乃令馬車居前  
順風鼓灰賊不得視因以火燒布然馬驚奔突賊陣因使後車弓弩

亂發鉦鼓鳴震羣盜波駭破散追逐傷斬無數梟其渠帥郡境以清  
荊州刺史趙凱誣奏琰實非身破賊而妄有其功琰與相章奏凱有  
黨助遂檻車徵琰防禁嚴密無由自訟乃噬臂出血書衣爲章具陳  
破賊形勢又言凱所誣狀潛令親屬詣闕通之詔書原琰拜議郎凱  
反受誣人之罪旋三遷爲渤海太守所在有異政以事免後尙書令  
張溫特表薦之徵拜尙書僕射以病乞骸骨卒于家

贊曰琰計破賊以勞定功政聲藉藉有祖父風然景風之賞未甄  
膚受之言互及卒致自明眞誣異報固足爲公道之快亦以徵琰  
之能也

漢駱俊傳

駱俊字孝遠縣人察孝廉補尙書郎擢拜陳留相值袁術僭號盜起  
俊保疆境賊不敢犯濟養百姓歲獲豐稔時鄰郡饑荒人多仰給俊  
傾貲賑贍全活甚衆育子者厚致米肉所生子多以駱爲名後術衆  
饑求糧俊拒絕術怒密使殺之



吳駱統傳

駱統字公緒父俊爲袁術所害統八歲與親客歸會稽幼聰慧有顯名孫權領會稽太守統年二十試爲烏程相民戶過萬咸嗟其惠理權嘉之召爲功曹行騎都尉妻以從兄輔女統嘗勸權以尊賢接士勤求損益出爲建忠郎將時徵役繁數民戶損耗統上疏曰君國者以據疆土爲疆富制威福爲尊貴曜德義爲榮顯永世胤爲豐祚然財須民生疆賴民力威恃民勢福由民殖德恃民茂義以民行六者旣備然後應天受祚權威統言深加意焉隨陸遜破蜀軍於宜都遷偏將軍曹仁攻濡須使別將襲中州統拒破之封新陽亭侯後爲濡須督數陳便宜前後書數十上所言皆善權納用焉年三十六卒

南齊朱幼

朱幼字長明其先魯人漢朱雲之後避亂過江曾祖汎字孝祥晉永興中任臨海太守秩滿來徙義烏蒲墟村寢成大族後名蒲墟曰赤岸幼歷高辛平昌淮陽三郡太守遷揚州刺史兼度支治揚有功人

歌曰朱幼渡江東人安盜賊空

贊曰俊能濟養百姓惠及鄰郡統乃盡忠於吳建功立業幼之治  
揚有功人安盜空是皆政績彰著有功於世者也君子稱之固亦  
宜矣然統仕孫權昧知正統觀者取節焉爾

朱葉秦傳

葉秦字實之縣人父維休伯父維芑連擢進士第秦以世科累遷太  
常寺主簿輪對言中書政本宜清心正己以求賢爲務時宰不然改  
軍器監丞差知荆門會京西帥幕建議築城東蒙兩山之巔秦以山  
無水泉且非敵路條其不便者六置制使趙方主先入之說不從秦  
歎曰敝民誤國寧有去耳遂解印綬去有旨除夔州路轉運判官俄  
復予祠結廬東山扁曰抗雲祠滿差知武岡軍未上而卒弟暮亦進  
士子由庚別有傳

宋朱質傳

朱質字仲文縣之溪西人受學呂祖謙而卒業於唐仲友紹熙親策

多士質次之後陳春秋大義以復讎爲說孝宗聞之大喜質自兩使  
職官任回用故事改秩厯武學諭博士召試館職自正字三遷至著  
作郎兼侍左郎官開禧初金使入見倨慢上書乞斬之時韓侂冑用  
事雖不行其言然遂下詔北伐擢質右正言左司諫皆兼侍講奏疏  
論邊事甚悉及師出無功侂冑乃欲議和質猶以爲和不可恃侂冑  
怒卽日移太常少卿兼權吏部侍郎嘉定再和遂以謫去用累赦復  
官予祠差知道州未及上而致仕積階朝散大夫有易說舉要奏議  
詩文雜稿

### 宋黃夢炎傳

黃夢炎字子暘其先由浦江徙義烏曾祖中輔以風節聞夢炎博學  
善文淳祐末登進士第關陞入京湖制幕以掌故准備差遣平反盜  
公庫銀寃獄得釋者數十百人入淮東制幕主管機宜文字建議蠲  
放屯租邊民賴以安業出判平江府擢節浮蠹以代民輸租白免淮  
西總領累歲所索無名錢民力以甦咸淳初除司農寺丞輪對力陳

時弊請減浮費乞戒宴私度宗嘉納除樞密院編修官累遷戶部左  
曹郎官仍兼編修與時宰不合引年以朝請大夫致仕扁所居曰桂  
隱室曰澹齋有詩文十卷

贊曰依世則道廢違俗則身危此古人於爵位所以難也秦輪對  
言政有干時宰朝廷不從解印去職質陳春秋大義以復讎爲說  
而以和議爲不可見黜侂冑夢炎力陳時弊請減浮費與宰執不  
合引年致仕孔子謂以道事君三子近之矣

### 宋康植傳

康植字子厚上世家金華父仲穎字韞之擢第後試中教官始來遷  
義烏仕至尙書吏部郎中居官以清白稱植登世科自奉化縣主簿  
三遷爲武安軍節度掌書記以需次之暇執經於徐僑之門者三年  
端平更化侍僑赴京喬行簡欲處以職事植亟赴書記任制置使史  
嵩之團結漁舟防江植持不可嵩之怒對移江陵酒官請奉祠徑歸  
未幾除刑工部架閣文字遷國子正改通直郎輪對言事抗直忤時



宰意差通判廣德軍救荒有法陞知本軍以治最聞召知大宗正丞  
遷兵部郎官出爲浙西提點刑獄公事劾奏平江守臣史宅之治郡  
無狀嵩之宅之兄也時爲丞相并連及之其言以謂子之不思掩前  
人之愆專務聚斂以事貢獻是以小忠而成其大不忠也嵩之不知  
而使之不智知而使之不仁其上罔陛下又不忠之大者也羣臣明  
知其罪而不言皆逆採陛下之意而不敢嬰其鋒是逢君之惡亦不  
忠之徒也疏入理宗震怒欲重罪之杜丞相範時在樞府爲之極諫  
謂憲臣言事既不中又加之罪如天下公議何理宗尋悟乃徙宅之  
隆興而植提刑福建改知寧國府兼權江南東路提舉茶鹽義倉奏  
免和糴行經界法除都官郎中出知吉州改福建路轉運判官兼攝  
建寧府振水菑拯鹽弊政惠大孚赴闕奏事卒于建谿驛積階朝奉  
郎

宋朱元龍傳

朱元龍字景雲縣人從徐僑學登嘉定十六年進士第歷平陽青陽

尉調饒州司理參軍德興令誣其民董氏五兄弟溺死縣卒具獄上力辨其非辜其兄弟得不死後皆爲名進士他所平反者甚衆嘉熙元年以處州縉雲縣令治最擢幹辦行在諸司糧料院輪對論三邊形勢理宗嘉納語近臣曰朱元龍好臺諫官除宗正寺主簿陞宗正丞兼權左司郎官京局官或挾權貴勢求舉牘輒斥之曰舉牘可以勢取耶中官有求封節者力持不可宰臣傳上旨令改擬對曰吾職可罷擬筆不可改也宗室有圩田之訟舉朝無敢可否元龍毅然決之歲旱宰執勸上幸明慶寺禮佛元龍曰稽首號泥佛蘇軾且不爲可以天子而爲之乎時方括兩淮浮鹽致書執政以謂朝廷行商賈之事廟堂踵諸閭之規使史氏書曰括浮鹽自今始不可又辨督府殺富民王倫之寃而活其子兩上封事言自宮禁朝廷以及百官萬民皆可痛哭流涕於是史嵩之入相疾其直言遂以斥去差知衢吉二州皆旋予祠改知台州以憂不上旣而鄭清之再入相素惡其剛直遂以朝奉大夫致仕家居十年乃卒有遺藁十卷及讀騷集子幼

學用蔭入仕終臨安府觀察推官從子杰繼取進士治郡有能聲卒官將作少監

贊曰徐僑承朱子之緒傳聖賢之學倡道烏傷及門之士多著賢行若康植朱元龍者而發於政事之間尤光明俊偉王柏銘植墓稱其操尚之堅風力之勁有得於僑之遺則噫獨植而已哉

朱喻偁傳

喻偁字伯經縣之香山人蚤從從祖良弼學繼受經於陳亮由太學生登慶元己未進士第調宣城尉有境外盜狙入尉界內偁登執之歸于府府帥臣邱密異之開禧丙寅金人犯淮府檄令尉二人餉軍由歷陽達鍾離鍾離乃敵衝要法當以重兵護糧護不滿千人令畏縮不敢前偁奮不顧難遂行卒致饋于濠糧有羨遷慶元府觀察推官外艱不赴調隆興府觀察推官真德秀來爲帥素知偁能文將薦之德秀去偁爲宜春丞宜春地接贛吉吏珥筆成風民善訟偁忤忤諒直聽必以情民退無後言凡訴臺部者必曰得宜春丞一聽死無

人物語  
憾改奉議郎簽書鎮南軍節度判官聽公事改章服陞朝奉郎遂請  
祠歸築室夫人峯下曰蘆隱所著有蘆隱類稿五十卷隨類錄二百  
卷從弟南強

南強字伯強從陳亮游亮爲當路排罪且不測門人畏其威焰噤不  
敢出聲南強義形辭色見葉適及諸臺官備陳冤狀卒直之慶元間  
連貢于鄉入太學俛奉南廊對授邊功部臨安府富陽縣尉轉修職  
郎南強創射樓補闕卒額民有以癩死女誣人者南強辨其狀立抵  
以罪境內多盜販禁捕之雖貽權勢怨弗懼禮部侍郎真德秀以言  
事去廟堂風京尹跡其所至欲并以爲罪德秀舟過富春江南強亟  
見賦詩爲餞人皆壯之轉承直郎處州縉雲丞未上卒所著有梅隱  
筆談十四卷

贊曰杜游稱侶質而不俚華而不靡憤而不激怨而不懟不以食  
膾炙爲美澹乎其有味不以刺文綉爲工黯乎其有光其感時念  
故推物類情抑揚離合必窮其源以揚其波其不合於律者鮮矣

不亦誠然乎哉

宋虞復傳

虞復字從道縣之華溪人師事倪千里傳永嘉春秋之學由太學登進士第以楊村酒官上緝熙殿四十八規理宗大喜擢主管戶部架閣文字累遷藉田令歷武學諭宗正寺主簿莊文府教授太常博士大宗正丞出知信州時史嵩之開督府以御札盡收列郡利權因上表進愛養根本之說大忤其意有旨除都官郎官御史金淵承風旨奏寢新命遂奉祠而歸祠滿差知興化軍不赴嵩之雖去而鄭清之再相復亦其所忌退居東巖十有五年清之罷董丞相槐力薦於朝待次桂陽軍俄除金部郎官兼國史院編修官實錄院檢討官入見改尙右郎官輪對舉大學正心誠意爲綱領分好樂忿懣爲節目援漢文帝欲造露臺以爲好樂之勸上嘉納丐外差知寧國府改知瑞州命未下以疾革請納祿得旨轉朝議大夫致仕所著有成己集告蒙告忠遠齋集合八十餘卷



贊曰虞復屢上封事言論剴切庶乎能感格君心可謂務引以當道矣卒忤時宰遂致落職然守正不阿窮達不變彼以古人之迹見繩無以加焉觀其見推於喬行簡見舉於董槐傳云同明相照同類相求其斯之謂歟

宋樓大年傳

樓大年字元齡縣之竹山里人父伯寬由太學入官授江陰縣尉轉知無爲軍襄安鎮以終大年從徐僑游登嘉定癸未進士第調青陽縣尉監嘉興府袁部鹽場尋知嘉興青龍鎮擢遂安縣令差兩浙西路提刑司幹辦公事兩易監行在會子庫同列以侵欺被劾唯大年獨免改知南昌縣爲治先教化建利去病若嗜欲然縣民夜行爲讎家毆死事覺賂其甥來就辟甥自陳殺民狀甚悉大年疑之亟命承往驗承受賂使焚屍以滅迹大年怒聞于府屬錄事覆實錄事復受賂如丞大年正色抗辨錄事爲引去上之憲臺令觀察推定重讞事始白民敬之生爲立祠遷通判吉州提點刑獄李迪以大年廉愼命

錄一道滯囚大年隨重輕而疏裁之抱成案就迪言咸聽未幾攝郡事江東大姓查氏以父遺書據幼弟資產幾六十萬弟長訴之縣州歷二十年不解迪曰非清白吏如大年者不足以究此以其事下大年舉張詠決子婿爭財故事爲例命歸其弟人以爲允調承議郎提領戶部犒賞所主管文字尋陞朝奏郎卒于官

贊曰宋濂稱大年洞察民隱如晴空皎月一塵不染及解印綬去攀轅卧轍者綿亘十餘里或者以爲無愧古循吏云

### 皇明朱文傳

朱文字悅道縣之赤岸人從王禕游學博才膽剛方少可許人洪武六年舉明經授知星子縣廉介自持興學勸農奏其縣山高風冷春意來遲艱於茶上可其奏遂罷茶貢人惠之後陞贛州府同知盡心撫綏秩滿民庶擁留至今贛民立祠祀之

贊曰宋濂跋其文論議必本諸經而翼以濂洛關閩之說旣履康衢矣長安雖遠惡有不至哉他日道明德立而文益昌予當在知

言之列粵考文章政事蔚有可觀誠無愧於潛溪所稱者焉

皇明龔永吉傳

龔永吉字天民縣之在城人父泰字叔安卒官戶科都給事永吉舉鄉薦授職方司主事陞武選郎中以事謫戍平涼時北虜犯邊用兵部尙書王驥薦爲佐軍從討之尋詔驥南討麓川緬甸等處及征剿苗蠻養孟等處永吉俱從出師皆有勲績累擢至大理寺卿決獄多平反成化改元上疏乞骸歸七年卒于家子全名用蔭知贛縣

贊曰史稱張釋之爲廷尉天下無冤民于定國爲廷尉民自以爲不冤彼無冤民者君子猶以爲不及而况推情研實不能無說焉者嗚呼大理古廷尉職天下之平也唯公正明恕有守者宜居之永吉在大理至今有板卿之號可謂執法者矣



義烏人物記卷之下

續金華叢書

後學金江著

後學金沙校

文學篇

文者天地之精鬼神之奧所以演貞元之妙蘊發聖賢之心法者也先王之文如布帛菽粟日用之不可無者也後世教弛以文爲藝小技揚而大道湮始專意以爲文夫文以載道也是故陰陽變化繫於易治忽幾微定於書成孝厚倫刪於詩尊王賤霸修於春秋辨敘名物悅和人神則見於禮樂蓋有是道則有是文探於道而得於言者也亦有以二帝三王爲根本以六經四教爲宗師撰述著作雄辭逸氣足以發舒志意衛翼聖教遂於文者則其鬱於道者也吾邑文士自南齊至于今其間鉅儒碩士鍾靈產秀或風興瀟灑或議論純確或析理毫芒羽翼經傳是皆所以洩元化之英華貫六經之體要者也若徒以雕刻

爲工而於道無所裨益適以滋弊耳亦奚尙之哉

南齊處士婁幼瑜傳

婁幼瑜字季玉縣人聚徒教授不應徵辟著禮掇拾三十卷禮記摭遺一卷文集六十六卷

贊曰宋濂序華川文派自隋至唐宋名士輩出若幼瑜則其尤者也惜乎其著述之富皆散逸無存然吾邑儒宗推婁子云爾

唐駱賓王傳

駱賓王縣人七歲能賦詩與王勃楊炯盧照隣以文章齊名號爲四傑賓王初爲道王府屬歷武功長安主簿遷臨海丞鞅鞅不得志棄官去武后時徐敬業起兵署爲府屬敬業傳檄天下斥武后罪后讀至一坏之土未乾六尺之孤何在矍然曰誰爲之或以賓王對后曰宰相安得失此人敬業敗賓王不知所之中宗時詔求其文得數百篇

贊曰新室篡漢劉崇帥百餘人攻宛不入而敗綱目書起兵書死

之予倡義也至於英公亦書起兵而著其怨望蓋誅心之法特與其事耳賓王是時就辟爲府屬觀其所作檄文斥武后罪至今痛快人心誠亦知順逆之道者然使得志於孽后之朝則又不敢決其必在五王之黨否也然則與宋樊若水又何異焉觀其文藝之美則以王楊盧駱並稱嗚呼先器識而後文藝裴公固已識之矣

宋楊忱中傳

楊忱中字德夫縣之赤岸人祖昂字漢卿登進士第終通直郎知分水縣忱中擢國子監丞累遷朝請大夫知蘄州著易原三卷其言欲觀八卦生而爲六十四卦請玩先天圖欲觀八卦重而爲六十四卦則繫辭說卦之所言康節之極數知來其妙在於加一倍法孫焯累官中奉大夫知南雄州贈通議大夫點樵煥炳仕不大顯與焯俱以文名於時焯子埴所學尤博自號芥軒以蔭補官累遷奉直大夫知肇慶府爵金華縣開國男食邑三百戶

贊曰楊氏之學家傳有自昂以進士起家繼登科第見於先達題

名者十有三人雖仕不大顯其文學之盛爲時論所歸若忱中優  
於經學又所謂傑出諸楊者矣

宋喻良能傳

喻良能字叔奇其先居富陽宋初始遷義烏之香山父葆光娶黃氏  
睦盜起青溪婦翁以白金千五百兩屬葆光窖藏之盜平婦翁亦死  
三子俱幼莫知金所寓葆光舉而歸之三子請奉數百兩爲謝葆光  
雖貧力辭弗受人稱其長者黃氏脫簪珥買書延師教其五子皆有  
成立後以良能貴累贈其父大中大夫黃氏令人良能與兄良倚同  
入太學又同年登進士第初補廣德尉三獲強盜應賞格辭不受調  
鄱陽丞遷國子監主簿進忠義傳起戰國王蠲止五代孫晟通一百  
九十人乞頒之武學授之將帥孝宗嘉歎郎侍臣曰喻良能質實平  
正御書其名于屏間丁內艱服除以國子博士召兼工部郎官除太  
常丞兼舊職請外知處州尋奉祠而歸以朝請大夫義烏縣開國男  
食邑三百戶致仕鄉人慕其名立石表其地曰郎官里所著有諸經



講義五卷香山集三十四卷家帚編十五卷忠義傳二十卷從子不  
伐倂演國衡皆進士不伐甲科

良倚字伯壽卒官臨海丞有唐論四卷詩文十卷策斷二卷文選補  
一卷

良弼字季直太學生特科補新喻尉有杉堂集十卷樂府五卷

宋何恪傳

何恪字茂恭縣之官塘人父渠多才略睦寇竊發詣軍門獻策主帥  
楊維忠用其言以取勝奏補承信郎監恩州酒稅營卒謀爲變密白  
郡守而往誅其元惡釋其誅誤上功轉承節郎神武後軍統制劉光  
世辟主管本府機宜文字未踰月徑歸每謂人曰使吾二子文行有  
成勝吾擁使節疏侯封也恪與兄恢皆感勵而力學及同上春官恪  
中選恢欣然曰是足以報吾父矣遂謝場屋恪性好古藏書至萬卷  
博覽而工於文初主永新簿再調徽州錄事參軍未赴詣廟上萬言  
書進恢復二十策與朝論不合歸治園築亭奉母爲樂俄先母死所



著有南湖集二十卷從孫器噩器取進士終於廣昌丞善爲古詩噩亦工詩有曲汀集

宋陳炳傳

陳炳字德先縣之在城人好古文務爲奇語登進士第爲太平縣主簿有易解五卷進卷五卷巖堂雜藁二十卷

贊曰龍川陳亮謂邑士之稱雄者四人喻良能於人煦煦有恩意能使人別去三日念之不釋其爲文精深簡雅讀之愈久而意若新良弼遇人無親疎貴賤皆與之盡其情其文蔚茂馳騁蓋將包羅衆體而一字不苟讀之豐豐而無厭何恪目空四海獨能降意於一世豪傑而士亦樂親之其文奇壯精緻反覆開闔而卒能自闡其意陳炳舉一世不足以當其意而人亦不願從之游然其文清新勁麗要不可少云

宋徐僑傳

徐僑字崇甫其先諸暨人有祖官吳越爲常侍始遷於義烏之龍陵

從學於呂祖謙門人葉邦登淳熙十四年進士第調上饒主簿始受業朱熹之門熹稱其明白剛直命以教名齋歷紹興南康司法皆以憂去嘉定七年出嚴州推官考滿差主管刑工部架閣文字除國子錄召試館職除秘書省正字遷校書郎請外知和州徙知安慶府十一年除提舉江南東路常平茶鹽事上書極言朝廷時政請詔大臣以正已之道正人憂家之慮憂國庶幾救安於已危迂治於將亂丞相史彌遠怒令言者劾罷之理宗卽位禮部侍郎真德秀奏亮直敢言如徐僑者願寘之言地時史彌遠猶在相位不報葛洪喬行簡代爲請祠迄不受祿遂引年告老紹興六年朝廷更化收用老成落致仕除直寶謨閣江東提刑尋除秘書少監改太常少卿屢辭逾年始入覲手疏數千言皆感憤剴切上爲竦聽顧見其衣垢履敝愀然謂曰卿何貧甚耶對曰臣不貧陛下乃貧耳上曰朕何謂貧對曰陛下國本未建疆宇曰威權倖用事將帥非材旱蝗相仍盜賊並起經用無藝帑藏空虛民困於橫斂軍怨於掊剋羣臣養交而天子孤立國

勢阽危而陛下不悟臣不貧陛下乃貧耳又言女謁閭宦表裏用事  
帝爲之感動改容咨嗟太息明日手詔罷邊帥之尤無狀者申儆羣  
臣以朋黨爲之戒命有司裁節中外浮費而賜僑金帛甚厚僑固辭  
不受除兼侍講尋兼權國子祭酒勸講之際開陳友愛大義遂復皇  
子竑爵且建言子思宜配享孔子二程子宜列從祀王安石宜廢勿  
祀趙汝愚宜配享寧宗帝皆如其請論王楫使事僑以旣無國書則  
非正使宜館之於外如晉叔向辭鄭故事與時宰論不合力求去帝  
諭留甚勤遷工部侍郎求去益堅陞集英殿修撰提舉佑神觀兼侍  
讀僑奏領祠勸讀乃體貌重臣之殊禮力辭不敢當遂以寶模閣待  
制奉祠卒年七十八諡文清所著有讀易記三卷讀詩記詠一卷雜  
說一卷文集若干卷子錄鈞鑄皆傳其家學以世賞入官

贊曰朱子之學大行於婺由徐僑與何基始基承再傳之緒於黃  
幹而僑則親承指授於朱子者也故制行純篤風節高邁其立朝  
剛直感格君心實能行所學矣授以高位而展其志則天下當被

其澤屢請奉祠不獲大行惜哉

宋傅芷傳

傅芷字升可世家縣之雲黃山下宋初有名雄者始遷蘆砦芷六經俱通尤精於史學從游之士戶履常滿登淳熙五年進士第僅得天台仙居尉未上而卒有講義及南園詩文雜藁二十卷再從弟珩字季佩好學能文有松岡類藁從曾孫藻字伯長受業黃潛以才行見稱由本邑校官擢監察御史遷武昌太守後超拜河南廉使以終

宋王邁傳

王邁字正叔縣之鳳林人通諸經尤長於詩登第後需次弋陽尉諸生爲結廬於龍門山奉而學焉淳祐四年郡守趙汝騰以其經明行修與何基並薦于朝基累被召除崇政殿說書不授而邁以有官不召亦未到官而卒

宋傅寅傳

傅寅字同叔縣之杏溪人母禱於石姥山而生幼嗜學經史百家悉

能成誦比長益求異書而讀之間從唐仲友質疑問難皆有援據可反覆仲友喜曰吾益友也及聞其升陞分陝之說語門人曰職方輿地盡在同叔腹中矣寅於天文地理明堂封建井田律曆兵制之類世儒置而不講者靡不窮究根穴訂其譌繆號曰羣書百攷呂大愚閱其禹貢圖攷曰可謂集諸家之大成矣黃文叔欲與同列奏補以官知爲不可屈乃止學者因其居稱之曰杏溪先生卒年六十八猶子定從末子游仲子大原皆世其家學

### 宋施郁傳

施郁字景文縣人由太學內舍登高第擢國子博士從子南一字與之咸淳龍飛第六人官太學博士與石一鰲黃潛同時並以文學教授從遊者以百數名人科士多出其間兩施所著有石氏易互言總論春秋經傳紀要

贊曰淳熙咸淳間縣之能文章者唯傳芷王邁爲盛而兩施次之遂於研幾優於博覽則寅一人而已寅之著述意其必有大異人



者觀唐呂所推與有足徵焉今皆亡之惜哉

宋葉由庚傳

葉由庚字成父生而口吃嗜讀書習春秋爲舉子業試有司不中遂絕意進取時徐僑倡明朱熹之學由庚執經從之僑授以申誠仁命性心六字之說由庚蚤夜磨礪探窮經旨驗之於躬行期凝合而無間僑謂人曰成父從僑最久靜愿無他好講學意趣殊深吾道爲有所託矣遂以通名其齋居且戒之曰心體之流行卽天運之流行也無乎不通而塞之人其物矣由庚佩之終身金華何基王柏皆宗於熹學次第相傳遠有端緒皆慕由庚造詣真切相與貽書辨析至無虛月基柏皆深服其言嘗謂古人知行並進聞一善言見一善行未之能行唯恐有聞若纏蔽於文字間待其知至而後行是終無可行之日也人以爲名言平生不務著書惟研濂洛諸儒之說以教人僅有論語纂遺若干卷詩文若干卷瘖叟自誌一卷藏于家

贊曰由庚之學得於徐僑徐僑之學得於考亭其淵源蓋有自矣

又與何王二子往來甚密貽書辨析然則衍吾邑之道脉者非由  
庚而誰

宋陳龜傳

陳龜字孟定縣人志趣高邁不喜自銜靖康初游太學京城陷束書  
東歸結茅爲屋於雞鳴山之陽采蔬拾薪以奉其母而母亦歡然忘  
其憂自號靜翁有詩稿五卷

元劉應龜傳

劉應龜字元益縣之青巖人應龜少恢疎常落落多大志宋咸淳間  
游太學馬丞相高其材將妻以女應龜不可由是名稱藉甚久之當  
以優陞解褐值德祐失國退隱南山之南人稱爲山南先生會使者  
行部知應龜賢強起主教鄉邑始幡然出山卽席更調月泉山長改  
正杭學尋以疾卒應龜學本經濟而以簡易爲宗讀書務識義趣未  
嘗牽引破碎以給浮說至其爲文雄肆俊拔飈駛水飛一出於已無  
少貶以追世好世亦未有能好之者所著有夢稿痴稿聽雨留稿共

二十卷

元傳野傳

傳野字景文縣人博學工文辭與劉應龜相繼以詩鳴於時黃潛嘗評其所作精切整暇如清江漫流一碧千里而魚龍百怪隱見不常云

元陳堯道傳

陳堯道字景傳縣人父希聲以文學爲後進師堯道好學不羈浮游物表以能詩聲黃潛稱其詩涵肆彬蔚如奇葩珍木洪纖高下雜植於名園終日翫之而不厭弟舜道朝出耕夜歸讀古人書薄已而厚物縉紳稱之謂可比古之獨行君子云

元王炎澤傳

王炎澤字威仲縣之鳳林人父濟景定二年國子免解進士炎澤少嗜書稍長治舉子業有聲鄉邦當宋運去物改之後而場屋事廢因得專意探索聖賢之微旨家庭所受既得其素又從徐僑門人傳考

亭之學風聲氣習之所存感發尤多而操行愈堅窮居約處開門授徒絕口不言仕進者久之部使者起爲東陽常山兩縣教諭遷石峽書院山長所至以善教稱已而棄官歸隱於家學者尊爲南稜先生炎澤待人一本於誠言論磊落無所隱蔽莫不敬服爲諸生講說務推明大義不事支離穿鑿爲文簡質而主於理詩極渾厚而間出奇語不屑以雕刻求工所著有南稜類稿二十卷二子良玉常山教諭良珉義烏訓導

元石一鰲傳

元石一鰲字晉卿縣之松山人宋景定甲子鄉貢進士少從世傑得徐僑之端緒學茂而聲遠嘗典教邑庠從學數百人多取高第故名愈振晚年覃思於易著互言總論十卷子子定善事繼母以孝稱

贊曰當宋之季神州沈璧斯時臣民宜不共戴天以死國難不然葛巾野服迹跡山林其殆庶幾矣乎陳鼎傳野堯道舜道其宋之逸民也歟應龜炎澤一鰲潛晦弗耀乃得之矣爲部使者強主教

鄉邑何耶

元黃潛傳

黃潛字晉卿縣之在城人母夢大星煜煜然墜于懷乃有娠歷二十四月始生幼俊異善文嘗著弔諸葛武侯辭劉應龜見而歎曰吾鄉以文鳴者喻叔奇兄弟耳此子稍加工其不與之抗衡乎因留受業登延祐二年進士第授台州寧海丞陞諸暨判官用薦者召爲應奉翰林文字同知制誥兼國史編修官轉國子博士改江浙等處儒學提舉上納祿侍親之請以秘書少監致仕未幾召除翰林直學士知制誥同修國史尋兼經筵官陞侍講學士仍兼前職階中奉大夫上章求歸田里不俟報而行帝聞之遣使者追還京師復爲前官久之得謝而歸七年卒贈中奉大夫江西等處行中書省參知政事護軍追封江夏郡公諡文獻所著有文集三十卷筆記子梓字仲恭餘姚同知

贊曰危素稱潛論著譬之澄湖不波一碧萬頃非深知其文者能



若是不

元朱震亨傳

朱震亨字彥修縣之赤岸人稟資爽朗讀書卽了大義爲聲律之賦刻燭而成豪邁負俠聞許謙承考亭之學卽摳衣至門而師事之謙爲開明聖賢大旨震亨心領神悟抑其疎豪歸于粹美不以一毫苟且自恕而欲見之踐履嘗應試赴闈不利喟然歎曰修齊政治皆一理耳苟能推一家之政以達鄉閭寧非仕乎乃建祠奉祭講行朱子家禮屏釋老之教罷讀神之祀持公平以服衆心排紛難以安閭里人多德之俄母病延醫因自悟曰人子而不知醫或委之庸人寧無失乎於是研究醫學博求名師得羅知悌之傳治症多獲奇效蓋其理明識精所學必過乎人嘗著宋論格致餘論局方發揮傷寒論辯外科精要發揮本草衍義補遺風水問答學者因其所居稱爲丹溪先生

贊曰周宗智修郡志書震亨隸方技是焉知震亨者乎觀其師事

許謙一聞其言超然領悟棄任俠之習趨聖賢之途不亦豪傑之士哉

### 皇明金涓傳

金涓字德原縣之在城人自幼警敏日記數千言比長遂大肆力於經傳聞許謙承考亭之緒講道八華山中乃執經從之謙語曰學者必以五性人倫爲本以開明心術變化氣質爲先以爲己爲立心之要以分辯義利爲處事之制德原朝夕惕勵研究奧旨體驗踐履務期脗合時同門者百數十人獨稱爲入室高弟又嘗受業黃潛潛見其文辭簡古奇之宋濂稱德元氣雄而言腴發爲文章尤雅健有奇氣不但長於詩而已與吳萊宋濂王禕朱廉輩爲友講索益精博考治聞遂淹貫經史暨諸子百家之言靡不及其蘊奧至於古今治亂之源政治得失之機偉人傑士閎謀異績行兵用師決機制勝之要歷歷布在胸臆善於指陳而縱橫之是是非非使聽者心目爲之廓然及其乘豪攄興援筆爲詩文頃刻千百言不自休率新麗雄贍

可喜可愕時胡元入主中國德原薄其時嘆曰世道如此雖欲有爲其可得乎遂杜門謝客以私淑於心者授諸後進遠邇爭趨之雖虞集柳貫上章交薦卒不出迨及國朝有司聞其名屢加薦辟德原固辭不起曰犧樽青黃非木所願孤豚之好游戲污瀆且吾髮已種種焉能馳驅簪組之間哉如是厭所居逼市去縣南蜀山之下青村隱居以著述自娛焉學者因稱之曰青村先生惟撫竹灌花翫雲弄月朋舊扣門輒焚香瀹茗抵掌劇談促席對榻連日夜不盡歡不止客去卽復閉關不妄出朱廉撰青村隱居記稱爲安貞肥遯之士所著有文集湖西藁青村藁總凡四十卷散逸無存行於世僅有遺藁二卷子存字思存從宋濂遊洪武中以明經薦授北平布政司參議爲同寅誣指謫戍而卒有文集十六卷孫伸字孟高以太學生知四川富順縣以廉能名有詩集十卷

贊曰出處之際不亦難哉是故孔子可以往佛肸之召子路尙不免於衛而閔子則善辭焉龜山之從蔡京薦也人以爲未可與權

彼皆以聖賢之徒猶有所議而况後世功名之士乎哉又况富貴之士乎哉是故不罔從人清修吉士德原之不授薦辟宋潛侯曰爲己功深可以觀所養矣

### 皇明朱廉傳

朱廉字伯清縣之赤岸人曾祖昶從徐僑游精究理學著太極演說經世補遺祖叔麒承家傳之懿見之爲政厯官同知黃巖浮梁二州事以朝列大夫婺州路總管府治中致仕號遯山父同善字性與幼承家學復從許謙講授研究奧旨嘗應辟爲兩淮屯府幕屬未數月解職歸隱以所居曰裕軒遂以爲號廉自少涵濡過庭之訓刻苦勵志淹貫經傳悉領要義旣而學文於黃潛遂以文章知名及婺歸國朝之初知府王宗顯器其學材辟爲郡學師及浙東行省右丞李曹公文忠開鎮嚴州尤加禮敬遂移長鈞臺書院未幾丁外艱洪武三年詔修元史聖朝日曆起爲纂修官史成拜翰林編修八年乘輿巡幸中都命廉扈駕至滁州上問卿有紀勝之作比至中都進紀行十

首上覽而大喜曰佳詩朕爲汝和有頃召廉賜示和六詩當時以爲榮旣而授經楚府尋陞長史久之兩耳病聵遂致仕而歸窮經講誦採研聖學嘗取朱熹語類摘其精義名曰理學纂言其爲文謹嚴精密有文集一十七卷子棟字子建強記過人亦以文名永樂初薦授國子助教以疾卒于官孫曄字文華領鄉薦任無錫縣學訓導

贊曰江觀宋濂序理學纂言稱廉能繼朱子之志而爲孝子衷考師友淵源家傳有自德學充粹信足徵焉

### 皇明樓璉傳

樓璉字士連縣之竹山里人祖有成字玉汝習六藝而文著學童識字吳萊稱精緻可傳就檄任無爲路學錄父光亨字景元從吳萊學宋濂序其梅溪詩藁稱爲法度之詩璉蚤承庭訓復從宋濂游經學淵邃文章峻潔爲同門所推洪武中由儒士召授宣寧主簿歷仁壽大治陞藍田知縣轉廣東道監察御史以事謫戍雲南洱海有居夷集五卷用薦召陞翰林侍讀尋卒于官



贊曰有成光亨爲世通儒而璉蔚有祖父風奕世載美可謂克構者矣

皇明王紳傳

王紳字仲縉幼孤鞠於其兄綬聰敏好學承家傳之懿從學於宋濂濂教爲文章卽能馳騁變化議論鑿鑿出入人表濂器之曰吾友王待制其有後乎紳事母盡孝及卒哀毀踰禮未幾綬亦歿然單居然其文辭亦著稱於時蜀王聞其名聘至藩府行以賓禮紳念父禕持節死雲南遠在萬里外乃請於上乞往求遺殖王憫而貲其行旣至訪求不獲遂於死所立木主號慟奠祭聞者泣下有滇南慟哭記以著志旣還王禮遇之益至未幾以文行薦於朝召爲國子博士宏經講解六館翕然俄得疾卒於官年四十有一所著有繼志齋文集三十卷行於世

皇明王祿傳

王祿字叔豐自幼潛心勉學博覽羣書侍父入蜀游學京師父

人牛言卷一  
歿扶柩歸葬終喪復登名儒之門以卒所業文詞稱於士林永樂中嘗預修郡邑志以病贖不仕號贖樵所著有青巖類藁

皇明王汝傳

王汝字允達少孤思繼家學讀書極勤苦素貧能守道自樂登成化戊戌進士第嘗上疏乞就郡教授奉忠文公祀不遂乃授中書舍人守正不阿甫三載見有進不以道者恥與爲伍遂謝病歸築精舍齊山下取累世所積書讀之若將終身焉弘治改元兵部主事婁性都御史虞瑤交薦於朝遂與翰林檢討陳獻章同被召汝猶力辭侍講學士謝鐸祭酒章懋勉之行逾年始就道至淮病偶增劇未抵京師五十里卒因所居齊山學者稱之曰齊山先生所著有齊山文集若干卷藏於家子俯字彥高太學生

贊曰君子謂國朝文獻金華爲盛王氏於金華爲尤盛蓋禕之文章節操關天下休明之治而繼志闡善如紳之文豐蔚雅贍非適爲鄉里之望若稔之孝義清白不失世守所著又和雅沖淡粹然

不戾乎正而汶亦世濟其美豈獨一家之範而已哉韓愈曰莫爲  
於前雖美勿彰莫爲於後雖盛不傳王氏有焉

人物記卷下終

永康胡宗楸据傳鈔本校錄

赤松山去金華城東北十五里上有洞天石室諸勝仙人黃初平之  
所遊栖宋嘉定間沖和先生遯跡來茲有倪守約潛心宗風號松山  
羽士承其衣鉢居是山者四十寒暑舊有刊本事實守約重輯是編  
以詒來者山之事蹟不止此以涉于仙蹟者爲主故厘成一卷道藏  
及知服齋叢書咸收錄此書余弱冠曾游其地今展是編紫巖翠嶂  
如在目前疇昔飛屐上下猶可想見其勝槩云季樵胡宗楸



似奔日誦細音無異上不離河賦貝其細製云李謝詩家

亦賦細微聲書氣外難此書余願深會其賦今賦是歸諸賦

以爲來書山之重題不立此以爲平山題書爲主姑置凡一

賦主平其文其意最山音四十幾書音其本事實中其重神其

得詩得宋意其詞得宋意其意其來紋音其山其意其山

旅山山其金華其東其十五里上音其天音其結其山其

金華寺  
松山寺

表勵準



甲子春永康宗校  
子永胡楸鋟

金華赤松山志序

余自龔黜慕希夷之風，豐爲葛天氏之民，家寓松山之左耳。所聞目所見，凡赤松子、二皇君得道之由來，雖未能詳知，而歷貫亦已默契乎胸中矣。遂捨家辭父母來投師資，粵自承恩，備冠裳未數積，今四十餘年，晨香夕鐙，未嘗敢懈。每靜坐丹晨靖中，無他念想，惟恐靈蹤仙迹無以啟迪後人耳。家山舊有刊本事實，歲久而磨滅不存。余曰：「旣爲二皇君之子孫，忝冲和先生之餘裔，其可使祖師之道不顯乎？」乃採摭源流，舉其宏綱，撮其機要，定爲一編號，曰「赤松山志」。俾來者有可攷焉。若夫神仙傳記之所錄、經典碑銘之所載、父老之所傳、風月之所詠，觀乎此則不待旁搜而後知也。偈曰：「掛一漏萬，擇焉而不精語焉而不詳，則負罪其奚以？」文松山羽士竹泉倪守約序。

案傳記云：郡人徐氏遇而得仙。徐氏今日壺天真人、弈碁之所。今日碁盤其所由來者漸矣。真人旣遇赤松子，乃隱匿名字，寄迹於上霄，優游洞天。之左而修煉靈元，卒能乘雲御氣，賓於帝庭。真人

既不炫世故時代亦不可攷然流福一方民到於今受其賜修煉之所今日壺屏亦曰徐公壺真人之祠宮中及碁盤壺屏俱有祠焉凡遇祈禱守宰必迎奉香火求請聖水每歲一郡士民祭祀日以爲常



金華赤松山志

續金華叢書

宋道士倪守約撰

二皇君

丹溪皇氏婺之隱姓也皇氏顯於東晉上祖皆隱德不仕明帝大甯三年四月八日皇氏生長子諱初起是爲大皇君成帝咸和三年八月十三日生次子諱初平是爲小皇君二君生而穎悟俊拔秀聳有異相小君年十五家使牧羊遇一道士愛其良謹引入於金華山之石室蓋赤松子幻相而引之小君卽煉質其中絕棄世塵追求象罔且謂朱髓之訣指掌而可明上帝之庭鞠躬而自致積善累功踰四十稔大君念小君之不返巡歷山水尋覓蹤迹而不得見後遇一道士善卜就占之道士曰金華山中有牧羊兒非卿弟耶遂同至石室此亦赤松子幻相而引之兄弟相見且悲且喜大君問曰羊何在小君曰近在山東及大君往視了無所見惟見白石無數還謂小君曰無羊小君曰羊在耳但兄自不見便俱往山東小君言叱吒於是白

石皆起成羊數萬頭今卧羊山卽是其所大君曰我弟得神道如此  
吾可學不君曰惟好道便得大君便棄妻兒留就小君共服松脂茯苓  
至五千日能坐在立亡日中無影有童子之色修道旣成還鄉省  
親則故老皆無在者今石室之下有洞焉蓋二君深隱之祕宮也二  
君以服脂苓方教授弟子南伯逢等其後傳授又數十人得仙神仙  
傳曰二君得道之後大君號魯班小君亦號赤松子此蓋二君不炫  
名驚世故詭姓遁身以求不顯此乃祖述赤松子稱黃石公之遺意  
也二君道備於松山絕頂爲煉丹計丹成大君則鹿騎小君則鶴駕  
乘雲上昇今大蕢山卽是也二君旣仙同邦之人相與謀而置棲神  
之所遂建赤松宮偕其師赤松子而奉祀焉召學其道者而主之自  
晉而我朝香火綿滋道士常盈百敬奉之心未有涯也案仙錄南嶽  
衡山太虛真人得道處玉帝命小皇君主之賜神姓崇名壘號司天  
主世界分野孝廟淳熙十六年封大君爲冲應真人小君爲養素真  
人理廟景定三年加封大君冲應淨感真人封小君養素淨正真人

猗歟休哉大道流行正教恢闡福庇於婺垂千萬年

丹類

遺丹

案遺丹記云二皇君煉丹成道而上昇丹竈故基與井俱存遺丹在山變現不常或大或小或近或遠人多目擊不可枚舉丹山遇夜及昏或隱晦或煙雨必霏霏如日出光豈非遺丹之洞煥歟今略撫一二言之守山道士吳奉師常畜白雞伺曉一日閒雞驚鳴舉首視之乃啄一物微似彈丸有五彩光卽以合格之亟招同袍作禮及偕來啟合丹已去矣又守山道士沈應符至更初見窗外光彩閃爍遂開戶視之有物大如雞子其光漸遠又卽近其光愈遠復歸戶其光照窗如初殊不知山神呵護可遠觀而不可褻翫焉

丹竈

竈如三級壇上有丹鼎

丹墓

在丹山大清殿之左以眞陽所聚遇雪不積草木不萎

洞穴類

洞元洞天

係三十六洞天亦名金華洞天與赤松山相接分上中下三洞上曰朝眞中曰冰壺下曰雙龍奇偉俊拔岩穴奮踞風雲凝互氣勢磅礴上逼牛斗之輝下接羅浮之脈上洞有石眞人儼然臨跨莫測端倪中洞有水簾直下寒玉橫飛其間有石像石筍等案之仙經知其有異山神守衛不通塵迹下洞有石龍虎獅象麟鳳鐘鼓之類難可枚數又有雪山等處鄱陽湯中曾有詩曰金堂玉室相掩映珠簾翠箔誰褰開蓋以洞中有動用什物室宇戶牖故也下洞門極低非舟不可入旣入非燭不可見此洞天元係赤松所轄據博異志云皇氏兄弟得道游止之地洞天福地志云郡人皇氏於此學道凡投告龍簡必至焉理廟嘉熙間祈嗣告盟於此宮中有御醮青詞碑可攷

優游洞



在上霄去宮十里去壺屏一望之隔洞門高五尺許入門則高廣二三丈自左昇梯而上又於上扶梯而入其中舉而視之則虛曠如大厦數十間之廣又出於三十六洞天之外煙霞交鎖石髓流英父老所傳則曰壺天眞人所治之區二皇君校籍之所潛齋王公埜亦留題曰上霄非晚出煙霞寄孤嶠青戶旣鬱鬱白乳仍皤皤徐眞人有祠其側

### 石室洞

在螺螄岩之側卽赤松子引小皇君入山修道之所上則石室高深丈餘方廣相等洞在其左自二皇君得道之後洞門深鎖人不可到

### 山類

### 金華山

周迴數十里卽赤松山是也抱朴子云此地可以居神免五嶽洪水之患漢三十代天師虛靜先生張君好善嘗一游歷慨慕赤松子之風二皇君之迹乃留詠曰家在白雲中約在赤松子謁來此山游龍



虎鎮相似金華莫外求黃芽已如此

### 煉丹山

高數千尋去宮五里自宮左循坦途而去至山下度小橋由峻嶺而上其上平曠景物不凡一望數百里近在目睫蓋二皇君煉丹之所其上有菴歲差道士主之丹光洞煥輝潤草木山中凡可以爲藥者三百餘種梁沈約爲本郡太守有詩紀之朋來握石髓賓至駕輕鴻都令人徑絕唯使雲路通紹興閒降香祈福於此其下有仙田凡一二里細碎不成片段遠望高下若階級相傳以爲二皇君植靈苗胡麻之地自五代以來嘗以種香黍每歲必以進貢唐本觀道士舒道紀有詩云至今丹井水香滿此山田後因雜種五穀而此田所出不復可進矣

### 卧羊山

周迴數里其高數十尋正與赤松宮相對卽小皇君叱石成羊之地其上石羊現沒無常山神呵護不容凡人有所希覬林木茂盛深不

可入東坡先生嘗有詩讚之曰先生養生如牧羊放之無何有之鄉止者曰止行者行先生超然坐其傍挾冊讀書羊不亡化而爲石起復僵流涎磨牙笑虎狼先生指呼羊服箱又太學博士三山鄭士懿來此曾有詩曰見羊疑是已叱石見石翻疑未叱羊非石非羊何所見這些意思難商量

### 大黃山

在宮之東一里而近乃二皇君飛舉之地俗呼爲墮墜山以山勢自壺屏奔龍而下幡結於此岌岌其勢故也

### 聖石山

在卧羊山之左宮之南其山相對隔漢皆田也向有十數巨石在田中其廣數圍妨礙耕作乃禱於二皇君次曉則石已飛過山傍衆歎神異指爲聖石二皇君差仙官主之

### 螺獅巖

在石室之左其巖內竅通於石室洞外有峇峇之形內有空洞之象

巖勢盤折若螺螄就以爲名

劉道巖

在螺螄巖之左昔有學道者劉道人於此得道而去

壺屏

在優游洞之左壺天真入修煉之所此地實處履之空空有聲虛處隨足陷沒不可舉

水類

小桃源

在宮之側宮內自左廡可問桃源之津沂流而葑泉石相搏無風而濤行且百步有亭曰物外又百步橫澗爲橋榜曰三峽驚濤怒號葑莫知所窮後不見其所止殆與塵世相隔過磐石臨淡流不特與物外異亦與三峽異橫絕一小橋有亭在大石上曰石泓又沂而上潺湲不絕度傑石而後可據槁梧而坐丹山可由茲而上此乃二皇君三元八節邀集羣仙校籍之所山中入早行嘗有聞如官府拷掠聲

遲明尋覓則又杳無所見昔有栖碧御風冷然等處今不復存東萊呂先生有記以紀其勝

### 丹井

在丹山左隅二皇君得道將欲飛舉乃爲石屏上有石荷蓋與龕相類奉所事石老君於內而埋井中不使後人知神仙蹤迹及井所在卻以他井代之其泉冬夏不涸可以治病神濟無方後有慢道者厭觸之其泉不通此井自塞守山道士方以井閉爲懼二皇君乃親降指示故井因忽不見亟鳩工掘土則見所藏老君在龕中顏色嚴古冠裳坐展皆肅整殆若天降眾共驚愕乃奉祠於太清殿今之丹井實故井也梁國葛惟肖乃稚川耳孫有詩紀之曰煉歌紫河車汲此太陰精鉛男沈玉洞汞女隱金城蓋爲是也

### 聖石灣

在宮堦送客亭下聖石山之左中有聖石屹立不動壺天真人曾參龍於此

清水潭

在宮之右過清亭之甬昔有一大石羊在此神仙恐爲凡人所得其羊竟滾入潭中而不可見皇祐閒洪水衝倒鐘樓鐘亦滾入其中竟失其所至今凡遇風清月白之夜聞其下鏗金琳瑯之韻似合步虛之節

宮宇類

寶積觀

卽赤松宮案觀碑自二皇君因赤松子傳授以道而得仙同邦之人議曰昔崆峒訪道帝王有順風之請瀨鄉立祠桑梓置棲神之所茲爲勝地可得忽乎遂建赤松宮真廟大中祥符元年始改今額宮與卧羊山相對宮甬有二派水合爲一流其一自上霄而下其一自碁盤穿小桃源而下宮內由左廡而上可問桃源之津由右廡而入可尋濯纓枕流之勝又數步可坐過清亭而觀漱玉徘徊官廳可覽騷人勝士之風月朝廷所降御書及石刻并詒勅等見奉安於宸翰堂



宮中自沖眞董先生立名於東京中太乙而顯道振宗代不乏人自  
紫虛黃先生重興觀業而規矩一新

金草觀

在雙龍洞側掌三洞香火元係赤松下觀

雲巢菴

在丹山上有屋數十楹宮中歲差道士往主之非惟巡掌形勝士夫  
捫松蘿而訪仙者則儻相游覽焉

太清殿

在丹山上雲巢之側今奉事石老君香火

二皇君祠

在大黃山下守宰謁告必至焉范浚有詩云靈祠千古餘眞迹祠下  
老松高百尺仙子騎鯨去不歸幾回借問山中石

壺天眞人祠

在優游洞堦一在壺屏一在碁盤一在宮內禱祈不絕

聖石仙官祠

在聖石灣左守掌聖石案議記云此石乃金寶所化能現光彩故二皇君令仙官主之

丹山仙官祠

在丹山上雲巢菴之側每遇丹光吐納必由於茲民有禱祈動無不應凡有登丹山而不加敬者必有彰報之驗而俾隆信道之心

雲臺觀

在城西十里外名曰鮑屋元是羅仙姑兄弟二人修道之菴曾遇台衣仙人而不火食繼有何仙姑兄弟二人復紹此菴請牒爲女冠亦八十餘而化後赤松子首移請蘭溪廢額以隸屬赤松下觀云

凝神菴

在城西十里外去溪陂塘一里乃朱宗師退修之地宗師勇退觀事結菴於此以奉父母香火誓絕人事而戶外之屢滿口口多訪焉潛齋王公埜有詩詠之拋卻林泉趣卓菴臨近村兩窗吞日月一室養

乾坤菊露秋籬重松風午枕喧蒲團數胎息不肯學傍門後數年遭  
過理廟賜凝神齋高士遂以爲名其後又復得御書凝神二字因以  
爲額

人物類

舒先生

先生名道紀唐代人也生長於婺爲赤松黃冠師存心養性之外惟  
以文墨自娛名公遞相推敬遊歷江湖在處寄其風月之章時有薦  
之於朝而大用之則又拂袖而去若將挽焉埋光鑿彩不求名聲自  
號華陰子常與禪月大師貫休爲莫逆交日夕瞻仰二皇君之祠若  
意交神會人莫測其遇與不遇也曾有詩曰松老赤松源松間廟宛  
然人皆有兄弟誰共得神仙雙鶴沖天去羣羊化石眠至今丹井水  
香滿此山田其後亦卻食不疾而化又數年有於赤城見之者

沖真董先生

先生名惟滋好學篤文不事生業隱寄赤松解悟經品思通神會時

貴以先生名薦之於神廟召試諸經理義敷暢上悅賜度牒爲赤松黃冠師繼賜冲眞師號及紫衣未幾掌東京中太乙事及哲廟元祐閒乃丐歸家山上嘉之復敕領寶積觀事

紫虛洞靈黃先生

先生名彥達字行可本郡人其家去宮二十里紫虛洞靈其師號也博學羣書精於唐宋之詩遇至人授以祕術於是諸大法無不參行救人疾苦祈禱響應四方歸向皆目之曰黃真人至紹興閒主觀事凡三十餘載一新觀規增置田畝道行賴其休庇至今無乏嘗置靈機堂爲修存導養計得暇則以琴棋自娛

至樂先生盛君

先生名曠字元放武林人也其母夢吞五色光而有姪自十歲學道於金華三洞及十五六遷寓赤松呵咽外喜吟詠凡寓於物入於題者必發而言之有華松篇一帙蓋取金華赤松居處之意也默朝內煉靡所不解紹興閒因內嬪傳其斬赤龍之道高廟聞其名詔寫其

容而召之乃野服入觀上賜坐談玄館於玉津園尋降賜御書扇又命其勘校道書繼而奏請如蜀之青城等處蒙恩允又賜空名度牒數道以資餽糧之費及回入觀上上悅賜至樂先生之號及金玉等物謝恩還山遂於宮中築一小菴曰迎陽先生尤精於易時與鶴山劉大辯講析其中又於所泊處命曰至樂窩愈默修煉嘗獨吟曰刊名紫簡羣魔賓扶桑暘谷奏玉晨控駕三素輔翊宸敢忘南嶽魏夫

人年七十餘趺坐而化

沖和先生周君

先生名大川字巨濟號澄齋本郡人也自幼入道潛心宗風承恩後有術者相之曰此人必可一言悟主及年德俱備寧廟聞其名乃詔入觀館於高士堂尋奉萬壽香火上甚禮貌之乃爲家山申請免和買雜敷仍立山門道正司又數年謝絕輭紅歸養故業眾又挽爲家山主人愛常住毫髮無欺贍眾無乏莊田負逋則捐已資而代償謹聲載道若夫吟詠抒情橫琴樂道人所不能易及也與通妙先生易



君如剛爲莫逆友嘉定閒上猶愛念二人俱賜象簡又俱賜先生號  
所得御書見崇奉於沖和道院之御書閣

道錄吳先生

先生名養浩平生讀書不倦十行俱下游歷江湖則與雲泉高士楊  
休文爲文章友玩弄筆硯朝中公卿皆屈禮招致之紹定閒文聲益  
振理廟聞其名召入覲令主太乙自是聖眷彌篤宣賜不一積階至  
左街道錄年七十餘而化

宋師朱先生

先生名知常字久道號此山本郡人也先生通儒學明釋老平生茹  
素嘗曰功名不足浼我慨從赤松子游爲黃冠師未半世兩住家山  
道尊人服寶祐丙辰裕齋制置馬相公先祖以檄召主茅山玉晨未  
幾司徒高士師坦以先生聞於理廟移鎮崇禧次年蒙恩召主佑聖  
觀遷左街鑒義凡遇雨陽祈禱屢應上悅遷凝神齋高士開慶閒韃  
虜渡江犯鄂渚於是上命立壇借陰兵助戰有驗賜左街道錄及象

簡香台孟盤錢幣至景定四年適茅山上清經錄嗣教宗師闕員上特御筆以先生名爲四十一代宗師先生少學易於鄉先生盧端叔後得易說於池陽周元舉遂以見聞集爲一編進之於上先生得易之道知進退之機咸淳乙丑浩然有歸志乃於房院之後築小菴以自娛

制誥類

赤松淩虛眞君制

敕道無方體供物之求兆見機祥發於感忽赤松眞君紀於仙錄神農之師雨暘並時有求必應一方所仰千載若存祇答靈休用伸茂典可加號赤松淩虛眞君

元符二年制 制在臺

二皇君誥

敕黃老之學雖以虛無爲主澹泊爲宗而原其用心實以善利愛人爲本初起眞君初平眞君爾生晉代隱於金華叱石起羊以爲得道

之驗汲井愈疾益廣救人之功歸然仙宮赫爾廟貌一方所恃千載  
若存東陽之民合辭以請其案仙品崇以美名緬想靈旂鑒吾哀典  
初起眞君可特封冲應眞人

初平眞君可特封養素眞人

淳熙十六年六月十七日

加封

敕至眞之妙昉於莊老之論神仙之事盛於秦漢以來然超乎冥漠  
之無形而邈若昭彰之有驗第一位冲應眞人第二位養素眞人惟  
爾兄弟流芳史書石叱而能起成形丹存而尙留遺燄駕霧騰雲則  
若恍若忽祈晴禱雨則隨感隨通至今寶積之祠起敬金華之地宜  
加徽號以稱眞風

第一位冲應眞人可特封冲應淨感眞人

第二位養素眞人可特封養素淨正眞人

景定三年十二月十日

碑籍類

碑

老君聖像碑

二皇君誥碑

在二皇君祠

真武戒世碑

在真武堂

御書蘭亭碑

御醺碑

御香碑

在宸翰堂

寶積觀碑

張虛靜先生撰

三清殿碑

路說撰

遺丹記碑

遺丹贊碑

竝厲堃撰

會仙閣記碑

赤松山碑

李陽冰書

長生碑

唐咸亨四年立

陰符經碑

小桃源碑

物外碑

洗耳碑

並虞似良書

太上感應篇碑

青雲閣記碑

並在青雲閣下

名公游山題詠碑

不可計數散在廊廡及官院并諸房院等處

檀信長生齋碑

檀信遠日齋碑

並在西廡

敕賜宗師碑

在此山道院

文籍

赤松子中誠經

在沖和道院

霍如菴參同契

在瞻翠閣



注太上感應篇

在青雲閣

經進易解

在此山道院

金華赤松山志終

永康胡宗楙据四庫全書本校鈐

赤松山去金華城東北十五里有洞天石室諸勝仙人黃初平之  
所遊栖宋嘉定間沖和先生遜跡來茲有倪守約潛心宗風號松山  
羽士承其衣鉢居是山者四十寒暑舊有刊本事實守約重輯是編  
以詒來者山之事蹟不止此以涉于仙蹟者爲主故厘成一卷道藏  
及知服齋叢書咸收錄此書余弱冠曾游其地今展是編紫巖翠嶂  
如在目前疇昔飛屐上下猶可想見其勝槩云季樵胡宗楸